




RUDAR

JAMA "OMAZIĆI"

UPRAVA DRUŠTVA

**SMANJENA
KONCENTRACIJA JAMSKIH
GASOVA I STVORENI
POVOLJNIJI USLOVI ZA
SANIRANJE POŽARA**

**POZIVAMO SVE UPOSLENIKE,
ČLANOVE OBA SINDIKATA,
DA U NAREDNOM PERIODU
ZAJEDNIČKIM RADOM DOPRINESU
STABILIZACIJI PROIZVODNJE I DA
NOVONASTALE DOGAĐAJE NE
KORISTE ZA DODATNO
USLOŽNJAVANJE SITUACIJE
U RUDNIKU**



ULAZ ZA RUDNIKU
METANSKA JAMA

POŽAR U JAMI „OMAZIĆI“ RUDNIKA „BANOVIĆI“

SANIRANJE POŽARA VRŠI SE AKTIVNOM I PASIVNOM METODOM GAŠENJA, ŠTAB ČETE ZA SPASAVANJE U STALNOM ZASJEDANJU

Dvadeset i osmog marta ove godine u ranim jutarnjim satima, po još nerazriješenim okolnostima, došlo je do izbijanja požara u jami „Omazići“ rudnika „Banovići“. Nešto prije sedam sati, između dvije smjene, kada u jami na svu sreću nije bilo radnika, u metanometrijskoj centrali primjećeno je povećanje koncentracije ugljen monoksida na koderu broj 19, koji je smješten u ulazu TP otkopnog polja $Z_{4/3}$. Nakon prelaska koncentracije maksimalno dozvoljenih gasova uslijedilo je upozorenje i zabrana silaska u jamu svim radnicima, osim članovima Čete za spasavanje iz te varijante, koji su pokušavali preventivno djelovati i na licu mjesta ustanoviti šta se dogodilo.

O slučaju su odmah obaviješteni Tehnički rukovodilac jame i Tehnički rukovodilac rudnika „Podzemna eksploatacija uglja“, koji su detaljnim provjerama, zajedno sa Četom za spasavanje, utvrdili da se dogodio otvoreni požar praćen velikom količinom dima.

Nakon pomenutih saznanja o požaru obaviješteni su i stariješina Štaba za spasavanje, direktor Društva, Izvršni direktor za tehničke poslove, te rukovodilac Službe zaštite na radu, koji su nakon sastanka Štaba obavijest i informaciju uputili prema svim nadležnim institucijama. Pravovremeno je obaviještena Federalna rudarska inspekcija, Policijska stanica u Banovićima, kao i Federalno ministarstvo energije, rudarstva i industrije. Po dojavi o požaru na teren su izašli Federalni rudarski inspektori Nuraga Duranović i Goran Gutić, koji su preduzeli sve zakonom propisane radnje neophodne u ovim situacijama, te uzeli izjave od očevidaca događaja. Isti dan direktor Društva Fadil Kudumović Odlukom broj 5459/21 proglasio je vanredno stanje u jami „Omazići“.

Uvid u stanje na požarnoj zoni obavili su iskusni članovi Čete za spasavanje na čelu sa stariješinom Štaba Hasanom Sejdinovićem, koji su pristupili metodama aktivnog gašenja požara. Nakon djelimičnog gašenja požara vodom aktivnosti su obustavljene nakon pruršavanja krovine, odnosno zatvaranja profila TN otkopnog polja Z_2 , što je onemogućilo vizualni uvid u stanje prostorije i dalje napredovanje, zbog slabe vidljivosti uslijed dima.

Evidentno je da je požar nastao u svježoj zračnoj struji, te da je poremećen režim provjetrovanja i otežana daljinska kontrola gasnog stanja pomoću koderu. Onemogućen je pristup požarnoj zoni i sa viših i sa nižih kota pristupnih prostorija zbog velike toplote i velike količine dima.

Na poslovima saniranja požara u jami angažovani su samo članovi Čete za spasavanje, dok je jedan dio radnika raspoređen u vanjskom krugu rudnika „Podzemna eksploatacija uglja“, a drugi dio poslan na korištenje prvog dijela godišnjeg odmora.



Od dana izbijanja požara članovi Štaba rudarskog spasavanja redovno održavaju sastanke, poduzimaju mjere, aktivnosti i postupke koji za cilj imaju gašenje požara. Kako bi se došlo do željenog cilja požar se gasi aktivnim i pasivnim metodama gašenja, prema Planovima rada koje izrađuje Tehnički rukovodilac jame, a odobrava Štab čete za spasavanje. Razmatraju se sve moguće varijante za prevazilaženje nastale situacije, a prije svega naglasak je stavljen na očuvanje i neugrožavanje ljudskih života.

Trenutno je teško procijeniti visinu nastale materijalne štete, ali u nastavku provođenja aktivnosti svakako će se voditi računa da ona bude minimalna. Važno je napomenuti da vrijedna mehanizacija u ovom momentu nije ugrožena, a ono što je još važnije, nije ugrožen nijedan ljudski život. To je potvrđeno inspekcijskim provjerama i pregledima gdje je konstatovano da su

poduzete sve zakonske radnje i da je evidentno pravovremeno informisanje o događaju svih nadležnih institucija.

Kada je u pitanju proizvodnja uglja u narednim mjesecima Rudnik će nastojati u ovoj vanrednoj situaciji ostvariti zacrtne planove proizvodnje i potpisane ugovore sa kupcima, na način da će proizvodnju u potpunosti usmjeriti na površinske kopove, koji su u mogućnosti ispoštovati povećane kapacitete. Svi radnici biće neoštećeni u pogledu isplate plata i toplog obroka.

Ovim povodom iz Uprave Društva poručuju da je ispunjenje navedinih ciljeva jedino moguće uz maksimalnu angažovanost svih uposlenika, odnosno ako svaki zaposlenik posao obavlja na najvećem nivou produktivnosti, jer, u konačnici, očuvanje Rudnika mora biti u interesu svakog pojedinca.

DALJNJE PROVOĐENJE AKTIVNOSTI NA SANIRANJU POŽARA U JAMI „OMAZIĆI“

Pri izbijanju požara u jami „Omazići“ nekoliko dana primjenjivana je aktivna metoda gašenja, da bi nakon pogoršanja prametara jamskih gasova ovaj metod obustavljen u ponoć između prvog i drugog aprila 2021. godine. Sve ekipe Čete za spasavanje povučene su iz jame, isključeno je glavno ventilatorsko postrojenje i kompletna jama je izolovana zidanim izolacionim pregradama. Razlog za ovakvo postupanje je realno stvaranje opasnosti za živote ljudi koji su gasili požar, obzirom da je požar zahvatio dio glavne izlazne zračne struje. Direktno je ugrožen sistem protočnog provjetravanja jame, onemogućen bezbjedan rad članova Čete za spasavanje na gašenju požara i bezbjedno povlačenje u slučaju opasnosti. Shodno tome, donešena je prethodna odluka.

Poduzimaju se sve Zakonom propisane radnje u ovakvim situacijama, u smislu pasivnog gašenja požara, zidanim izolacijom i konstantnim hlađenjem vodom.

Nakon prelaska na pasivnu metodu saniranja požara laboratorijskim analizama parametara u jami „Omazići“, u samo nekoliko dana primjetno je smanjenje koncentracije požarnih gasova, odnosno smanjenje ugljen monoksida i dotoka kisika, što predstavlja povoljnije uslove za gašenje nastalog požara.

Proces otvorenog gorenja prelazi u fazu tihe oksidacije, jer je sadržaj kisika u požarnoj zoni ispod 4%. Koderi ugljen monoksida koji su locirani u blizini požarnog područja pokazuju konstantno opadanje ugljičnog monoksida, koji lagano teži ka nuli.

Stalnom kontrolom i analizom podataka evidentno je da dosadašnje metode gašenja požara daju rezultate i stvaraju povoljnije uslove u smislu nastavka saniranja požara.

Prema riječima stariješine Štaba rudarskog spasavanja, Hasana Sejdinovića, donešena je odluka da se obustavi kontrolisano puštanje vode u požarno područje, zbog



stvaranja povoljnijih uslova i eventualnog prelaska na aktivno saniranje požara. Također navodi da je požar u nižim kotama požarne zone ugašen, a požar u višoj koti biće tretiran inertizacijom, odnosno ubacivanjem

inertnih plinova.

Štab rudarskog spasavanja razmatra još neke metode gašenja požara sa površine, a o njihovoj eventualnoj primjeni donijeti će odluku u narednom periodu.



JAMA „OMAZIĆI“ RUDNIKA „BANOVIĆI“

ODRŽAN SASTANAK SA STRUČNJACIMA IZ RUDARSKOG SEKTORA FBiH S CILJEM USAGLAŠAVANJA METODA SANIRANJA POŽARA

Sredinom aprila u prostorijama Direkcije Rudnika održan je sastanak Uprave Društva sa predstavnicima rudarskih institucija iz BiH, kao i onima koji su direktno učestvovali, odnosno imali lična iskustva na gašenju požara u jami sličnih razmjera. Prije nekoliko dana v.d. direktor Društva uputio je poziv za sastanak svim relevantnim institucijama rudarske struke, koje bi mogle pomoći u što bržem iznalaženju rješenja, te

na osnovu stručnog znanja i iskustva iznijeti adekvatne prijedloge za saniranje požara.

Pozivu su se odazvali predstavnici Rudarskog instituta Tuzla, Rudarskog fakulteta u Tuzli, rudnika „Kreka“, rudnika „Zenica“, rudnika „Breza“ i rudnika „Đurđevik“.

Sastanak je otvorio v.d. direktor Društva Fadil Kudumuić, koji se zahvalio prisutnima na dolasku i





želji da pomognu kako bi zajednički našli adekvatno rješenje za problem koji trenutno ima rudnik „Banovići“.

Na dnevnom redu sastanka našle su se tačke koje se odnose na upoznavanje prisutnih sa aktuelnim stanjem požara, te iznošenje prijedloga i smjernica za saniranje požara.

Na samom početku stariješina Štaba čete za spasavanje rudnika „Banovići“ Hasan Sejdinović detaljno je izvijestio prisutne o trenutnom stanju u jami „Omazići“ i dosadašnjim metodama saniranja požara. Nakon detaljnog izlaganja, konstruktivnih pitanja i prijedloga svih prisutnih na prvom sastanku ovog tipa donešeni su i određeni zaključci.

Prvi zaključak odnosi se na formiranje stručnog tima na nivou Rudnika čiji članovi će biti iskusni poznavaoци prilika u Podzemnoj eksploataciji uglja i koji će preuzeti vođenje aktivnosti saniranja požara, uz stalnu koordinaciju sa Četom za spasavanje. Njihova uloga odnosi se na dvadesetčetverosatno djelovanje, odnosno praćenje i razmatranje stanja, donošenje zaključaka i prijedloga o daljnjim aktivnostima na saniranju požara, te svakodnevno vođenje zapisnika na kojima će biti potpisi svih članova tima.

Jedan od prijedloga bio je i formiranje stručnog eksternog tima, sastavljenog od eksperata rudarskog sektora van okvira rudnika, koji će svakodnevno biti upućeni sa stanjem u jami i zavisno od razvoja situacije davati stručne prijedloge.

Jednoglasno je usvojen i zaključak da se u što kraćem vremenu, a po opadanju parametara jamskih gasova, pristupi aktivnoj metodi gašenja požara kroz glavni ulazni zračni niskop, gdje bi se dio po dio, odnosno

petlja po petlja uvodila u ventilacioni sistem jame, što bi omogućilo bezbijedno približavanje mjestu požara. Ovakav način saniranja požara pokazao se ispravnim rješenjem u više navrata, što su na sastanku potvrdili predstavnici rudnika „Breza“ i „Zenica“, podijelivši svoje iskustvo o aktivnostima gašenja požara, koji je ne tako davno zahvatio i njihove rudnike. Naveli su da je to dugotrajan proces koji u prosjeku traje 6-7 mjeseci i koji zahtjeva poseban oprez kod sigurnosti radnika uz strogo poštivanje svih propisanih pravila, ali koji se u njihovom slučaju pokazao najučinkovitijom metodom.

Ovakav potez menadžmenta Rudnika, da metodologiju za nastavak gašenja požara u jami „Omazići“ usaglase sa rudarskim stručnjacima iz cijele FBiH, pokazao se kao ispravno rješenje, što su potvrdili i sami učesnici navodeći da je ovo prijeratna praksa i način na koji su se zajednički rješavali problemi u rudnicima.



MIRNO OKUPLJANJE RUDARA ISPRED DIREKCIJE DRUŠTVA

PUNA PODRŠKA UPRAVI DRUŠTVA U PROCESU SANIRANJA POŽARA I SPREČAVANJU DESTABILIZACIJE RUDNIKA



Četa za spasavanje rudnika „Banovići“ došla je do požarišta u jami „Omazići“ i u toku je gašenje požara, poručio je v.d. direktor rudnika Fadil Kudumović okupljenim rudarima.

Naime, nedavno je došlo do spontanog okupljanja rudara ispred Direkcije Društva, koji su na taj način pružili nesebičnu podršku Upravi Društva u teškoj situaciji nastaloj kao posljedica izbijanja požara u jami.

Danima unazad u medijima kruže dezinformacije da je za novonastalu situaciju najvećim dijelom kriva Uprava Društva, da su tokom požara napravljene nesagledive materijalne štete i da je upitan posao za veliki broj rudara. Gledajući situaciju u prethodnih nekoliko mjeseci i borbu Uprave oko stabilizacije Rudnika, rudari su ovim potezom pokazali da vjeruju radu aktuelne Uprave i da neće dozvoliti destabilizaciju preduzeća i narušavanje međuljudskih odnosa u kolektivu.

Komorati su jednoglasno poručili da je stanje u Rudniku vrlo dobro i da situacija koja se desila u jami ne smije dovesti rudare do podjele, jer od ovog posla zavise svi. Kažu da samo jedinstvom mogu spriječiti one koji pokušavaju ovakav događaj iskoristiti u političke svrhe i vlastitu promociju.

Okupljene rudare pozdravio je v.d. direktor Rudnika Fadil Kudumović i istinski im se zahvalio na pruženoj podršci i

prilici da spase ugled, kredibilitet i namjeru dalje destabilizacije ovog preduzeća. Naglasio je da je ovo podrška istinskih i pravih rudara, koji brinu o rudniku i svojim radnim mjestima. Pozvao ih je da ne nasijedaju na razne provokacije plasirane putem medija i onih zaduženih za opstrukciju, te naveo da jedino radom i jedinstvom mogu sačuvati Rudnik i riješiti trenutnu situaciju u Podzemnoj eksploataciji uglja.

- Izbijanje požara u jami, po još nerazriješenim okolnostima, je lokalizovano i stvoreni su uslovi da Četa za spasavanje počne sa akcijom gašenja požara. Nadležne organe pustiti ćemo da istraže uzroke i detalje požara, a mi ćemo se usredotočiti na stabilizaciju stanja i gašenje požara na čelu sa stariješinom Čete za spasavanje Rudnika Hasanom Sejdinovićem, zasigurno najboljim pojedincem u svom poslu – kazao je direktor Kudumović.

Demantovao je i ranije neistinite izjave koje su se odnosile na tzv. eksploziju i zataškavanje požara od nadležnih institucija, te istakao da su odmah po izbijanju požara, odnosno nakon sastanka Štaba čete za spasavanje, obavješteni rudarski inspektori, PS Banovići, te Federalno ministarstvo energije, rudarstva i industrije.

- Prerano je govoriti o štetama koje su nastale prilikom požara, jer još uvijek nemamo pristup u jamu, ali ono zašto imamo saznanja je da su štete daleko manje nego što je to iznešeno u javnost. Ono što ovog trenutka sa sigurnošću



možemo reći je da mašine nisu ugrožene i njihova ispravnost i daljnji rad nije upitan. Nije upitna ni isplata plata, niti radna mjesta. Bez posla neće ostati nijedan radnik, ali neradnik i onaj koji opstruira sigurno hoće – poručio je v.d. direktor Kudumović.

Rezimirao je i nedavni boravak Premijera TK Kadrije Hodžića u Banovićima i njegovu, kako kaže, privatnu posjetu jami „Omazići“. Da je posjeta bila zvanična, tj. u ulozi Premijera cijelog Tuzlanskog kantona, trebala je otpočeti najavom i sastankom sa generalnim direktorom Društva, koji bi ga upoznao sa svim detaljima nemilog događaja.

- Premijer i ministri Vlade TK bili su na 50 metara od ulaza u jamu, a nijednog momenta nisu pitali šta se dešava i kakvo je stanje na terenu, niti su se udostojili kontaktirati nekoga iz Uprave Društva ili Čete za spasavanje Rudnika i pitati za stvarno stanje događaja, te na taj način pružiti podršku, kako to pravila nalažu – rekao je Kudumović.

Podršku rudarima i Upravi Rudnika svojim prisustvom dao je općinski načelnik dr. Bego Gutić. U obraćanju prisutnima ispred Direkcije Rudnika rekao je da će ljudi

koji vode Rudnik zasigurno izaći kao pobjednici iz ovog teškog perioda, a rudarima poručio da vjeruju u rad ovog rukovodstva i pruže im maksimalnu podršku. Osuđujuću notu uputio je prema Vladi TK na čelu sa Premijerom Hodžićem, jer je posjetu Rudniku iskoristio u privatne svrhe, obzirom da se pri dolasku nije najavio direktoru Društva od koga je jedino mogao dobiti pouzdane informacije. Načelnik je postavio retoričko pitanje zašto niko od predstavnika Vlade TK nije prisustvovao ovom okupljanju i zašto niko iz Vlade TK već pet dana od požara nije pitao menadžment Rudnika o ozbiljnosti situacije i stanju u jami „Omazići“.

Podsjećamo da je Općinsko vijeće Banovići na petoj redovnoj sjednici 31. marta usvojilo Zaključak u kojem se oštro osuđuje manipulisanje rudarima RMU „Banovići“ d.d. Banovići na tzv. skupu potpore Rudniku kojem je prisustvovao Premijer Vlade TK u organizaciji manjinskog sindikata, a koje je zloupotrijebljeno u političke svrhe.



POVRŠINSKA EKSPLOATACIJA UGLJA

NABAVKA BULDOZERA USLOV ZA NASTAVAK NESMETANE PROIZVODNJE



Nedostatak pomoćne mehanizacije, odnosno buldozera na Površinskoj eksploataciji uglja u narednom periodu mogao bi napraviti veliki problem u procesu proizvodnje. Sa površinskih kopova apeluju da se problem oko javnih nabavki riješi po urgentnom postupku, kako bi pomoćna mehanizacija u što kraćem vremenu stigla na teren, a proizvodni proces neometano teкао.

Naime, već tri godine Rudnik bezuspješno pokušava nabaviti četiri nova buldozera, prijeko potrebna na površinske kopove. Razlog dugotrajnosti realizacije postupka je neodgovornost i problem sa dobavljačima, koji ne mogu postići međusobni dogovor oko dobijanja tendera. Ova situacija Rudniku pravi velike probleme, kao i velike finansijske troškove, uzme li se u obzir podatak da je samo u prošloj godini utrošeno 6 miliona KM na rezervne dijelove za Belaz kamione. Veliki dio toškova je direktna posljedica nedostatka pomoćne mehanizacije, odnosno buldozera.

Trenutni problem na pogonu je otežano saniranje trasa, koje su poslije zimskog perioda uske i u lošem stanju. Potrebno ih je nasuti što je bez buldozera nemoguće uraditi. Problema ima i u Čubriću na odlagalištu taloga sa Separacije, gdje je svakodnevno neophodan bar jedan buldozer.

Trenutno su najpotrebnija mehanizacija s kojom je Rudnik u velikom deficitu. Raspoloživa su samo dva, po jedan na

svakom površinskom kopu, ali zbog izrađenosti ne pružaju potrebnu pouzdanost i dugoročno rješenje, iako se na njima redovno vrše popravke. Prošlogodišnjom nabavkom gredera djelimično je riješen problem, ali greder ne može obavljati složene poslove za koje je potreban buldozer.

U iznalaženje rješenja po pitanju pomoćne mehanizacije aktivno su uključeni tehnički rukovodilac Površinske eksploatacije uglja i Uprava Društva, koji su do sada više puta raspisivali tender i na sve moguće načine pokušali postići dogovor sa dobavljačima. Predmet o nabavci buldozera dugo vremena bio je na Uredu za žalbe, a tek nakon urgentnog dopisa od strane Rudnika, iz Ureda je stigao odgovor koji nije ostavljao drugu mogućnost osim ponovnog raspisivanja tendera, što će dodatno produžiti proces nabavke, ali i usložiti proces proizvodnje.



Slijedeći korak u rješavanju pomenute situacije je sačinjavanje dopisa o problematici nedostatka mehanizacije i njene kupovine putem javnih nabavki, a biće upućen na adrese Ministarstva industrije, rudarstva i energije, rudarskog inspektora i Vlade FBiH, koja bi se kao većinski vlasnik trebala uključiti u što brže rješavanje ovog gorućeg problema. Tražit će se hitna intervencija, odnosno mogućnost da se Rudnik izuzme iz Zakona o javnim nabavkama kada je u pitanju nabavka pomenute pomoćne mehanizacije.

I pored problema sa pomoćnom mehanizacijom na kopovima ispunjeni planovi proizvodnje

Od početka godine na površinskim kopovima proizvodnja uglja i otkrivke i pored određene problematike sa pomoćnom mehanizacijom, odvija se ustaljenom dinamikom. Novootkrivene količine uglja na oba površinska kopa zadovoljit će potrebe tržišta u narednom periodu, potvrdili su iz pogona.

- Ove godine, osim problema sa pomoćnom mehanizacijom, ne bi trebali imati značajnijih poteškoća u proizvodnji. Zadovoljit ćemo sve potrebe kupaca kada su u pitanju količine i kvalitet uglja. Na oba površinska kopa, po utvrđenom planu, odvijat će se proizvodnja uglja i otkrivke. Zbog veće pouzdanosti i stabilnosti proizvodnog procesa u ovoj godini u planu je nabavka dva damper kamiona, kao i bušilica. Naše bušilice su dotrajale zbog čega imamo

potrebu za nabavkom novih, a što se tiče damper kamiona oni će povećati sigurnost transporta u slučaju da dođe do iskakanja većeg broja kamiona - kaže tehnički rukovodilac Površinske eksploatacije uglja Ekrem Demirović.

Završen remont dva motora za damper kamione

U radionicama Površinske eksploatacije uglja nedavno je završen remont dva motora za damper kamione. Ovaj složeni proces, obzirom da je rađen u vlastitoj režiji, donio je velike finansijske uštede Rudniku. Remontovanje motora skupa je stavka koja bi u izvedbi drugih firmi koštala oko 300.000 KM. Tako da je i pored angažovanja radnika na popravci i servisiranju postojećih kamiona izdvojena ekipa stručnih radnika koja će vršiti remonte motora za kamione.



NOVI PRIJEM RADNIKA U RMU „BANOVIĆI“

86 UPOSLENIKA POČELO SA RADOM, PREOSTALIH 37 UGOVOR ĆE SKLOPITI NAKON PRESTANKA VANREDNOG STANJA U JAMI I STVARANJA NEOPHODNIH USLOVA ZA POČETAK RADA

Nakon nedavno provedene konkursne procedure o prijemu novih radnika u rudnik Banovići, Odlukom uprave Društva u radni odnos na neodređeno vrijeme primljena su 123 uposlenika. Početkom aprila njih 86 zasnovalo je radni odnos i nakon urađenih ljekarskih pregleda raspoređeno na pogone Rudnika.

Zbog izbijanja požara i proglašenja vanrednog stanja u jami Rudnika „Podzemna eksploatacija uglja“, u kojoj je zaustavljen proces proizvodnje, Uprava Društva donijela je Odluku kojom se odgađa potpisivanje ugovora sa 37 uposlenika primljenih u ovaj pogon, do prestanka

vanrednog stanja i stvaranja uslova neophodnih za početak rada.

Odgadanje zasnivanja radnog odnosa sa navedenim radnicima uslijedilo je iz razloga što u vrijeme vanrednog stanja ne postoje uslovi za realizaciju njihove obuke i uvođenje u posao kao i upoznavanje sa propisima zaštite na radu.

U ime kolektiva rudnika „Banovići“ radnicima koji su zasnovali radni odnos želimo brzo prilagođavanje, dobre međuljudske odnose i nesmetano učešće u proizvodnim aktivnostima, a radnicima iz pogona Podzemne eksploatacije uglja što brži povratak na radna mjesta.

BANOVIČKI RUDARI NA VISINI ZADATKA

MJESEČNI PLAN PREBAČEN ZA NEŠTO VIŠE OD 15.000 TONA UGLJA

Ostvarenje proizvodnje uglja i otkrivke u rudniku „Banovići“, kao i pouzdano snabdijevanje potrošača odvija se planiranim tokom, a u prošlom mjesecu zabilježeni su i određeni prebačaji na proizvodnji uglja u iznosu od 15.338 tona. Mjesec mart, odnosno prvi kvartal ranijih godina bio je u znaku najniže godišnje proizvodnje, zbog niskih temperatura i manje potražnje za ugljem. Međutim, ove godine napravljen je izuzetak pa je uslijed povoljnijih uslova rada, pravovremenog djelovanja i angažovanja svih uposlenika, plan proizvodnje uglja prebačen preko 11%. Svi proizvodni kapaciteti rudarskog sektora bilježe rast proizvodnje u poređenju sa rezultatima iz prethodnih godina.

Za trideset i jedan dan mjeseca marta realizovano je 929.854 metara kubnih otkrivke, što je neznatno ispod plana, a kako je već pomenuto više u odnosu na prethodne godine.

Prebačaj plana nastavljen je i u prvoj polovini mjeseca aprila, kada je na površinskim kopovima zabilježena proizvodnja uglja u iznosu od 71.429 tona, što je 8,5% iznad plana i realizovano 470.270 m³ otkrivke. Kao što je poznato od 28. marta Rudnik radi u vanrednim okolnostima zbog izbijanja požara u jami „Omazići“, zbog čega je u potpunosti obustavljena proizvodnja iz ovog pogona. Tako je velika obaveza i odgovornost pala na površinske kopove, koji u narednom periodu, do saniranja stanja u jami, moraju nositi cjelokupnu planiranu proizvodnju na nivou Rudnika. Trenutno problema na površinskim kopovima nema, obzirom da je plan proizvodnje uglja ispunjen pa i prebačen, to je dobar indikator da će se u narednom periodu održati stabilan plasman ugovorenog uglja prema potrošačima.

Da bi se odgovorilo svim zahtjevima do kraja godine potrebno je održati pogonsku spremnost proizvodnih

kapaciteta, uspješno izvođenje remonta i tekućeg održavanja mašina i opreme, te smanjiti vrijeme trajanja neplaniranih zastoja.

Izvršni direktor za tehničke poslove Elvir Jamaković apeluje na zaposlenike da u ovim otežanim uslovima rada pokažu solidarnost i posvećenost poslu.

- U vremenu koje nam predstoji neophodno je da kolegama iz rudnika Podzemna eksploatacija uglja damo sveobuhvatnu podršku. Najbolja podrška treba da se ogleda u maksimalnom zalaganju pri izvršavanju radnih obaveza definisanih u opisu poslova, te da svoje znanje, volju i iskustvo usmjerimo na povećanje produktivnosti rada – rekao je Jamaković.

I pored problema prouzrokovanih pandemijom korona virusa, koja svima otežava rad, kao i nemilih događaja nastalih u jami „Omazići“, ni u jednom momentu nije ugrožen proces proizvodnje, što je dokaz da stručni, vrijedni i predani radnici postižu dobre rezultate u svim uslovima rada

Kada su u pitanju proizvodni rezultati sa početka tekuće godine može se konstatovati da je tokom januara došlo do blagog pada proizvodnje uglja i otkrivke uslijed nepovoljnih vremenskih uslova, niskih temperatura i čestih padavina. Proizvedeno je 119.438 tona uglja, a u istom periodu realizovano i 869.660 metara kubnih otkrivke.

Navedeni zaostatak sa samog početka godine nadoknađen je tokom mjeseca februara kada je proizvedeno 939.845 metara kubnih čvrste mase, odnosno zabilježen prebačaj na otkrivci. U tom periodu zabilježen je rast i na proizvodnji uglja kada je proizvedeno 127.817 tona separisanog uglja.



ORGANIZACIONA JEDINICA „SEPARACIJA“

PREDVIĐENE KOLIČINE UGLJA SEPARISANE I PLASIRANE NA TRŽIŠTE

Pojačana kontrola ispravnosti opreme, sanacija kritičnih tačaka i obezbjeđenje stabilne proizvodnje u RMU „Banovići“ nastavljena je i u prvim mjesecima ove godine. Na pogonu Separacija svakodnevni problemi rješavaju se u hodu, uz pravovremeno predviđanje uzroka problema i organizaciju dovoljnog broja radne snage, bez ugrožavanja procesa proizvodnje.

Tokom prve polovine mjeseca januara na Separaciji je došlo do podbačaja plana proizvodnje uglja uzrokovanog nepovoljnim vremenskim uslovima. Hladnoća je otežavala istovar, gdje je dolazilo do smrzavanja veće količine materijala, te je bilo neophodno uraditi čišćenje vagona za prevoz rovnog uglja. Pomoć u čišćenju pristigla je i sa drugih pogona Rudnika.

Međutim, tokom mjeseca februara ispunjeni su planovi i sustignut januarski zaostatak na proizvodnji uglja. Kako iz pogona kažu trenutno stanje je zadovoljavajuće, prati se dnevna dinamika proizvodnje i plasmana uglja, te na vrijeme obavljaju remontu strojeva. U slučaju potrebe za dužim zastojem Separacije, praksa je da se prvo obezbijedi prebačaj na proizvodnji uglja, a zatim obustavlja separisanje i vrše remontu kritičnih tačaka pogona.



Ono što trenutno stvara određene zastoje je sito 202 A na kojem je zbog dotrajalosti došlo do pucanja stranica. Kvarovi se nastoje adekvatno sanirati do nabavke novog sita za koga je procedura, iz mjera predostrožnosti, pokrenuta početkom januara tekuće godine.

U vlastitoj režiji sanirana je vanjska vaga na suhom odsijavanju čijim bi isključivanjem iz rada bio ugrožen proces proizvodnje. Improvizacijom i saradnjom sa građevinskom službom vraćena je u funkciju za tri dana, iako je za ovakav vid problema bilo predviđeno obustavljanje rada vage na 40 dana.

Usporavanje pomenute dinamike rada otklanjanja kvarova, kao i same proizvodnje uglja moglo bi uslijediti kao posljedica problema nabavke valjaka za trake, limova i repromaterijala. Dobavljači sve manje poštuju rokove isporuke, odustaju od tendera i nakon potpisivanja ugovora, a još se ne nazire početak sankcionisanja njihovih neodgovornih postupaka. Separacija je trenutno dovedena u situaciju da ne posjeduje limove, u slučaju potrebe prinuđeni su raditi sa starim limovima ili ih posuđivati sa drugih pogona.

Pored neophodnog repromaterijala, po strategiji poslovanja, u planu je i nabavka drobilce, vibracionog sita, pumpe, kompresora i duvaljke, materijala koji bi osigurao nesmetano separisanje, a ujedno i dovoljne količine uglja za tržište.

Iako je ove godine potpisan nešto drugačiji Ugovor sa JP „Elektroprivreda BiH“ i smanjene količine isporuke uglja za TE Tuzla, ukupni plasman proizvedenih količina uglja za sada nije upitan. Isporuka je proširena na nove kupce, a u toku su i pregovori sa TE Kakanj i Soda, za koju će se u narednom periodu isporučiti probne količine uglja. Očekivanja su da se ubrzo potpišu ugovori o isporuci, te dodatno stabilizuje plasman separisanog uglja.



USVOJEN GODIŠNJI PLAN POSLOVANJA RMU „BANOVIĆI“ d.d. BANOVIĆI

PLANIRAN NASTAVAK POZITIVNOG POSLOVANJA I U 2021. GODINI



Nadzorni odbor rudnika „Banovići“ na čelu sa predsjednikom mr. Edinom Kurtićem na 40. redovnoj sjednici usvojio je Godišnji plan poslovanja Rudnika za 2021. godinu, proisteklog iz nedavno revidovanog Trogodišnjeg plana poslovanja Društva.

Plan predstavlja instrument za racionalno usmjeravanje osnovnih poslovnih aktivnosti i funkciju Društva, s ciljem najadekvatnijeg iskorištavanja faktora i uslova privređivanja. Na osnovu usvojenog Plana koji osigurava nesmetano funkcionisanje Rudnika, može se normalno krenuti u redovno servisiranje dospelih obaveza i realizaciju nabavke neophodnih materijala.

Postavljene planske veličine sadržane u Godišnjem planu poslovanja, kao što su proizvodnja i plasman uglja, realizacija otkrivke, izrada pripremnih prostorija i raspoloživost mehanizacije, zasnovane su na ocijenjenim mogućnostima proizvodnje i prodaje uglja. Na osnovu toga u 2021. godini planirano je proizvesti 1.700.000 tona separisanog uglja, plasirati 1.538.000 tona uglja, te realizovati 12 miliona otkrivke. Planirana prosječna toplota uglja kretat će se u iznosu od 15,349 GJ/t. Broj zaposlenih ostat će zadržan na nivou od 2.900 izvršilaca sa prosječnom produktivnosti rada od 586 tona uglja po zaposlenom, dok će se prosječna plata kretati u iznosu oko 1.190 KM.

Zavisno od situacije na tržištu i mogućnosti plasmana uglja sprovodit će se i politika prodaje uz neophodno stalno praćenje potražnje na tržištu. Na osnovu dosadašnjeg

obima plasmana i u 2021. godini planirano je da se najveći dio uglja plasira u TE „Tuzla“ u iznosu od 918.000 tona, što je 59,69% učešća u ukupnom plasmanu. Međutim, već početkom godine JP „Elektroprivreda BiH“ iskazala je potrebu za dodatnim količinama banovičkog uglja od najmanje 20.000 tona, a ostavljena je i mogućnost za isporuku većih količina u zavisnosti od isporuke uglja iz rudnika u Koncernu. Što se tiče industrijskih potrošača očekuje se realizacija ugovorenih i planiranih količina za 2021. godinu, što bi predstavljalo povećanje u odnosu na prethodnu godinu za oko 50.000 tona separisanog uglja. Također, neki od potrošača najavili su mogućnost preuzimanja većih količina uglja od ugovorenih, a sve u zavisnosti od stanja na tržištu. Poseban akcenat u ovoj godini biće stavljen na proširenje plasmana na ino tržište.

Plan prihoda od uglja urađen je na bazi važećih cijena u 2020. godini. Očekivani prihodi Društva iznose 153.064.398 KM, dok se rashodi predviđaju u iznosu od 152.544.940 KM, iz čega proizilazi pozitivan finansijski rezultat u iznosu od 519.000 KM. Na planirani finansijski rezultat odrazili su se izdaci za plaće radnika utvrđeni u skladu sa posljednjim izmjenama Granskog kolektivnog ugovora, kojim je povećana najniža neto satnica rada, kao i plan troškova za topli obrok koji je ostao na nivou od 14 KM/dan.

Preduslov za ostvarenje ovakvih rezultata jeste preduzimanje niza mjera ekonomske politike koje će olakšati finansijski položaj Rudnika. Neke od značajnijih



mjera jesu rješavanje velikog broja radnika invalida II kategorije, koji predstavljaju veliko opterećenje troškova Društva, uspostavljanje finansijske discipline, kontrola ukupnih troškova, sniženje troškova na svim nivoima, aktivno vođenje politike cijena uglja, uspostavljanje konsolidacije proizvodnih i ekonomskih tokova, izmirivanje dospjelih obaveza po kreditima, realizacija sporazuma o izmirenju dugova sačinjenih sa ZZO i Zavodom za zapošljavanje.

Neophodno je nastaviti sprovođiti mjere apsolutne discipline u naplati potraživanja, odnosno stvaranju obaveza. Planira se uredno izmirivanje tekućeg dijela dugoročnih obaveza koje dopijevaju u 2021. godini, kao i kratkoročnih zaduženja.



POLITIKA INVESTIRANJA BIĆE VRŠENA STROGOM SELEKCIJOM PRIORITETA

Plan investicionih ulaganja za nabavku neophodnih mašina i uređaja u 2021. godini iznosi 25.851.000 KM, uključujući investicije koje su započete u 2020. godini. U prethodnoj godini i pored svih poteškoća započeto je nekoliko značajnih projekata kao što je nabavka buldozera gusjeničara, a koja već godinama zbog problema sa provođenjem javnih nabavki ne može biti okončana. Jedan od prioriteta je i započeta nabavka primarnog drobilnog postrojenja na Separaciji.

Tokom ove godine strogom selekcijom prioriteta na sve pogone Rudnika planirana su ulaganja u nabavku mašina i opreme u svrhu produktivnijeg funkcionisanja Rudnika. Neka od značajnijih ulaganja su: nabavka rovokopača gusjeničara, dozera, bušaće garniture, dizel motora CUMMINS, utovarivača, kamiona kiperu, specijalnog vozila za proizvodnju eksplozivnih materijala, trakastih transporteru, nabavka i ugradnja rezonantnog sita, hidrauličnog bagera gusjeničara, remontovane manevarske lokomotive normalnog kolosijeka, te Optike do Hotela Zlača za internet i televiziju.

- Ambicija nam je da ostvarimo što efikasniju i kvalitetniju proizvodnju uglja, tako da ćemo u narednom periodu nastaviti investicione poslove koje smo započeli u prethodnoj godini, ali i pokrenuti planirane projekte u ovoj godini. Uprkos poteškoćama sa kojima se susrećemo u okviru javnih nabavki, ali i onih koje već godinu dana prouzrokuje pandemija virusa COVID – 19, ići ćemo u pravcu investiranja u neophodnu opremu koja će uticati na povećanje produktivnosti rada i doprinijeti razvoju

preduzeća. Nabavka pomoćne mehanizacije je esencijalnog karaktera za Rudnik – rekao je Damir Mrkonjić, v.d. izvršni direktor za investicije i razvoj novih djelatnosti.

Pored planiranih investicija u iznosu od oko 26 miliona KM, prema riječima direktora Mrkonjića, u toku ove godine biće neophodno obezbijediti i finansijska sredstva za realizaciju nabavke odlagača za odlaganje otkrivke iz PK „Turija“ u iznosu od 12.635.999 KM, te 5 miliona KM za vezni transporter za prevoz otkrivke sa PK „Turija“.

Što se tiče izvora finansiranja za realizaciju planiranih investicija sredstva će biti obezbijedena iz amortizacije, tekućeg priliva, kao i dugoročnih kreditnih sredstava.



SKUPŠTINA DRUŠTVA USVOJILA REVIDOVANI TROGODIŠNJI PLAN POSLOVANJA
RMU „BANOVIĆI“ d.d. BANOVIĆI ZA PERIOD 2020. – 2022. GODINA

OSNOVA ZA REVIDOVANJE PLANA JE PROMJENA PLASMANA UGLJA PREMA JP „ELEKTROPRIVREDA BiH“

Nakon potpisivanja godišnjeg Ugovora za 2021. godinu sa JP „Elektroprivreda BiH“ i smanjenja ranije ugovorenih količina uglja za oko 150.000 tona neophodno je bilo izvršiti revidovanje Trogodišnjeg plana poslovanja za period 2020. – 2022. godina. Revidovani plan usvojen je sredinom marta na 14. vanrednoj sjednici Skupštine RMU „Banovići“ d.d. Banovići.

Plan poslovanja je i ranijih godina usklađivan sa potrebama JP „Elektroprivreda BiH“, kao glavnim kupcem banovičkog uglja. Osim promjena u plasmanu uglja, plan je obuhvatio i promjene vezane za izradu istražnih i pripremnih prostorija u jami, investicionih ulaganja, broja zaposlenih, te izmjenu određenih finansijskih veličina.

Proizvodni plan uglja ostao je isti kao u predhodnom periodu, a do promjene u finansijskim projekcijama došlo je zbog prošlogodišnjeg povećanja plata i toplog obroka zaposlenika, što nije bilo obuhvaćeno ranijim Trogodišnjim planom poslovanja.

Na ovaj način formiran je dokument koji predstavlja realnu sliku mogućnosti kako proizvodnje tako i plasmana uglja u narednom periodu, dajući projekciju potrebnih ulaganja na obezbjeđenju neophodnih preduslova za kontinuiranu proizvodnju.

Postavljeni zadaci u periodu od 2020. do 2022. godine su ostvariti ukupnu eksploataciju i preradu uglja u iznosu od 5.200.000 tona, uz prosječnu toplotu od 15,174 GJ/t i realizaciju direktne otkrivke od 36.800.000 metara kubnih čvrste mase. Izraditi 8.529 metara pripremnih i istražnih prostorija u jami, te obezbijediti plasman planiranih količina uglja.

Iz menadžmenta Rudnika navode da smanjenje količina uglja prema JP „Elektroprivreda BiH“ neće uticati na

planirano poslovanje preduzeća, obzirom da se zbog nepovoljne situacije u elektroenergetskom sektoru, odnosno rudnicima u Koncernu, traže dodatne količine banovičkog uglja koji je, posebno u ovom periodu, među rijetkim oslonac stabilne proizvodnje.

Kao najveći potrošač uglja svakako ostaje JP „Elektroprivreda BiH“ sa učešćem od 62% u ukupnom plasmanu, za potrebe ostale industrije planira se izdvojiti 21% ukupnog plasmana, opštoj i širokoj potrošnji 10% i za izvoz 7%.

Politika prodaje u planskom periodu zasniva se na istraživanju tržišta baziranog na industrijskim potrošačima, posebno potrošačima ugljeva sitnije granulacije, širenju ino tržišta i potpisivanju direktnih ugovora sa potrošačima bez posrednika.



Intenzivno se radi na vraćanju banovičkog uglja na tržište Srbije, sklopljen je direktni ugovor sa fabrikama šećera „Sunoko“ iz Novog Sada za isporuku 40.000 tona separisanog uglja. Ugovor sa šećeranom sklopan je i ranije, ali preko posrednika firme RoRo Srbija. Zbog boljih uslova poslovanja pokušava se usvojiti praksa da se ugovori potpisuju isključivo sa potrošačima.

Prema tome u posmatranom periodu Planom je predviđen pozitivan finansijski rezultat u ukupnom iznosu od 2.222.148 KM.

Projekciju poslovanja preduzeća pratit će i investiciona ulaganja koja su predviđena u ukupnom iznosu od 115.016.409 KM. Za naredni period u planu je investirati oko 50 miliona KM, za nabavku potrebne mehanizacije ključne za neometano održavanje proizvodnog procesa.



GODIŠNJI IZVJEŠTAJ SLUŽBE ZAŠTITE NA RADU ZA 2020. GODINU

97 POVREDA MANJE U ODNOSU NA 2019. GODINU

Na 40. redovnoj sjednici Nadzornog odbora Društva usvojen je Izvještaj o stanju zaštite na radu, zaštite od požara, rudarskog spasavanja i radu Službe zaštite na radu, zaštite od požara i rudarskog spasavanja u RMU „Banovići“ d.d. Banovići za 2020. godinu.

Najbitniji podatak Izvještaja svakako je taj da se u posmatranom periodu u Rudniku desilo 97 povreda manje u odnosu na 2019. godinu. Zabilježeno je ukupno 147 povreda od kojih je 127 lakših i 20 težih, te nije zabilježena nijedna povreda na radu sa smrtnim ishodom. Poređenja radi broj povreda u odnosu na 2019. godinu smanjen je za 40%.

Na osnovu broja povreda u 2020. godini izgubljeno je znatno manje radnih dana u poređenju sa brojem izgubljenih radnih dana u 2019. godini, što se pozitivno odrazilo na produktivnost rada i poslovanje Rudnika.

I pored redovnih pregleda i kontrole sprovođenja propisanih mjera iz oblasti zaštite na radu, protivpožarne zaštite, zaštite životne i radne sredine, kao i kontrole tehničke dokumentacije u svim organizacionim jedinicama Rudnika, najveći uzrok povreda je nepažnja radnika. Razlozi povređivanja bili su i otežani uslovi rada u zimskom periodu, niske temperature, neiskustvo novoprimitljenih radnika, te specifični uslovi rada u Rudniku Podzemna eksploatacija uglja.

Obzirom da je prethodna godina obilježena i kao godina pandemije virusa COVID – 19 u izvještajnom periodu vršena je i detaljna analiza provedenih aktivnosti na

sprečavanju širenja virusa. Od 16.03.2020. godine, kada je Vlada FBiH proglasila stanje nesreće uzrokovane pojavom virusa na teritoriji Federacije BiH, provedene su sve mjere u skladu sa naredbama Kriznog štaba, Vlade FBiH i drugih nadležnih institucija. Cilj je zaštita zdravlja i života radnika, te organizacija tehnološkog procesa u uslovima pandemije. Zbog blagovremenog poduzimanja mjera nije bilo značajnog širenja virusa unutar organizacionih jedinica Rudnika, a ni ugrožavanja proizvodnog procesa i obavljanja ostalih faza rada i radnih zadataka. Dokaz tome je i podatak da je u godini pandemije virusa COVID-19, ostvarena veća proizvodnja uglja i otkrivke u odnosu na prethodnu godinu. Ovim se pokazalo da su rudari bili i ostali oslonac društva, koji u najtežim situacijama izlaze kao pobjednici, jer su svoje zadatke adekvatno obavljali i u situaciji kada se prvi put susreću sa pandemijom nepoznatog virusa, koja je donijela i nova otežena pravila ponašanja u radu.

Pravilno provođenje epidemioloških mjera, kao i mjere zaštite na radu u prethodnoj godini kontrolisale su nadležne službe Rudnika, a redovne kontrole vršili su i inspekcijски organi, koji nisu imali većih primjedbi na rad preduzeća, a sve popratne primjedbe otklonjene su u zadatim rokovima. Iz svega navedenog može se konstatovati da je stanje zaštite na radu, zaštite od požara i rudarskog spasavanja RMU „Banovići“ d.d. Banovići u svim segmentima zadovoljilo sve propise Zakona zaštite na radu.



RUDAR informativna novina radnika
RMU "Banovići" d.d. Banovići

www.rmub.ba

Uređuje
Redakcioni odbor

DTP i štampa: "OFF SET" Tuzla

Riješenjem Republičkog komiteta
za informacije broj 04-651-537/77
od 6.9.1977.

List je uveden u Registar štampe R BiH.

E-mail: kontakt@rmub.ba
nadzorni.odbor@rmub.ba



OPĆINSKI NAČELNIK dr. BEGO GUTIĆ U PRVOJ ZVANIČNOJ POSJETI RUDNIKU „BANOVIĆI“ NASTAVITI DOBRU SARADNJU NA OBOSTRANI INTERES

Direktor rudnika „Banovići“ Fadil Kudumović nedavno je u prostorijama Direkcije Društva ugostio delegaciju Općine Banovići na čelu sa općinskim načelnikom dr. Begom Gutićem.

Na sastanku na kome se razgovaralo o proizvodno – finansijskom stanju Rudnika, Uprava Društva prezentovala je trenutno stanje proizvodno – tehnološkog procesa, finansijsku situaciju, kao i investicione planove i započete projekte. Riječi je bilo i o svakodnevnim problemima sa kojima se susreću tokom rada, ali i adekvatnom iznalaženju rješenja za iste, što je pokazala stabilizacija proizvodnog procesa u posljednjih 8 mjeseci, koliko i traje mandat Uprave Društva.

- Moram istaći da smo uložili velike napore da zatečeno loše stanje u Rudniku stabilizujemo koliko je to bilo moguće, mada problemi još uvijek postoje. Nastojat ćemo raditi istim tempom i praviti određene iskorake kako bi Rudniku vratili kredibilitet kakav je nekada imao – kazao je v.d. direktor Kudumović.

Načelnik dr. Gutić čestitao je menadžmentu Rudnika na poslovanju u prethodnih osam mjeseci i dao punu podršku u daljnjoj borbi za razvoj i stvaranje boljih uslova rada rudara. Naglasio je da isplata plata i poboljšanje standarda rudara i u nastavku mora biti prioritet poslovanja ovog privrednog subjekta. Punu podršku od Općine Banovići dobili su i projekti, započeti prije 14 godina, izgradnja termoelektrane i cementare u Banovićima. Naglašeno je da mega projekte poput ovih, treba da vodi država, jer lokalne zajednice nisu nadležne za energetski sektor, ali će uvijek biti podrška novoj izgradnji.

- Svjesni smo činjenice da je rudnik „Banovići“ ključno preduzeće u razvoju cjelokupne Općine i da njegovo stabilno funkcionisanje dobrim dijelom utiče i na stabilan budžet Općine. Veoma je bitno da Rudnik nesmetano funkcionise i da se sačuva svako radno mjesto. Siguran sam da ćemo u budućnosti održati dobru saradnju i da ćemo se međusobno pomagati u svim dodirnim tačkama – rekao je načelnik Gutić.

Na sastanku, kao jedan od prioriteta lokalne zajednice istaknuto je iznalaženje lokacije za zemljište u svrhu mezarja mjesnih zajednica Podgorje i Stražbenica, čemu će se nadležne službe Rudnika i Općine u narednom periodu više posvetiti, a sve kako bi mještanima ovih mjesnih zajednica stvorili adekvatne uslove za rješavanje problema. Otvoreno je i pitanje izmještanja mjesnog mezarja Bučik i pitanje davanja mišljenja Rudnika za građenje u eksploatacionom području. Jedan od zaključaka sastanka je da predstavnici nadležnih službi Općine i Rudnika zajednički sagledaju stanje po pitanju premještanja mezarja i izmjena Elaborata za građenje u eksploatacionom području Rudnika. Ovo će biti predmet detaljne analize u narednom periodu, te eventualnih izmjena i dopuna u skladu sa planovima Rudnika i potrebama Općine kao lokalne zajednice.

Istaknuto je da je zahvaljujući dobroj saradnji Općine i Rudnika u proteklom periodu obezbijedena uslovna saglasnost za rekonstrukciju stambenih jedinica za izbjegla i raseljena lica na području mjesne zajednice Podgorje i naselja Jezero, koji se realizuje u saradnji sa Federalnim ministarstvom raseljenih osoba i izbjeglica, ukupne vrijednosti oko 700 hiljada KM.

